



Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

## “ROH: KEHIDUPAN DUNIA DAN AKHIRAT”

16 Disember 2022 / 21 Jamadil Awwal 1444

الْحَمْدُ لِلَّهِ<sup>1</sup> الْقَائِلِ:

﴿ وَيَسْأَلُونَكَ عَنِ الرُّوحِ قُلِ الرُّوحُ مِنْ أَمْرِ رَبِّي وَمَا أُوتِيتُمْ مِنَ الْعِلْمِ إِلَّا قَلِيلًا ﴿٨٥﴾ ﴾

Bermaksud: Dan mereka bertanya kepada mu (Muhammad) tentang roh. Katakanlah, “roh itu termasuk urusan Tuhan ku, sedangkan kamu diberi pengetahuan hanya sedikit.”

(Surah Al Isra’ ayat 85)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ<sup>2</sup> وَعَلَى آلِهِ وَأَصْحَابِهِ وَالتَّابِعِينَ لَهُمْ يَا حَسَنُ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>3</sup> أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

### Para Jemaah yang Khatib Muliakan

Marilah kita tingkatkan ketakwaan ke hadrat Allah SWT dengan melaksanakan segala suruhan dan meninggalkan semua larangan Nya; membersihkan jiwa dari segala dosa dan noda, serta sifat-sifat mazmumah yang menghitamkan hati dan merosakkan amal. Mudah-mudahan kita dihimpunkan di hadapan Allah SWT dengan membawa *qalbun salim* (hati yang sejahtera) dan bekalan amal yang diterima. Mimbar akan memperdengarkan khutbah bertajuk: “ROH: KEHIDUPAN DUNIA DAN AKHIRAT”

### Sidang Jumaat yang dirahmati Allah,

Roh ialah urusan Tuhan yang tidak diketahui oleh manusia melainkan sedikit yang dikhabarkan wahyu. Berpandukan takrif kamus Dewan Bahasa dan Pustaka, roh bermaksud sesuatu yang dihembuskan Allah SWT ke dalam badan manusia dan hiduplah ia. Dalam al-Quran, roh memberi beberapa makna; antaranya dalam ayat 52 surah Asy-Syura, dirujuk al-Quran sebagai roh (yang menghidupkan hati).

<sup>1</sup> Pujian kepada Allah SWT

<sup>2</sup> Selawat ke atas Nabi Muhammad SAW

<sup>3</sup> Pesan Taqwa



Kebanyakan ulama' berpendapat roh dan jiwa memiliki unsur yang sama apabila membincangkan kedua-duanya. Kebiasaan masyarakat Melayu menyebut kedua-duanya sebagai rohani.

Namun, perlu diingat, perbincangan berkaitan roh bukanlah sesuatu yang didapati ilmunya melalui kajian dan penyelidikan, bahkan ia perkara ghaib yang wajib dipandu melalui wahyu al-Quran dan perkhabaran Sunnah Nabi SAW.

### Sidang Jumaat Rahimakumullah,

Sebelum lahir ke alam dunia, semua roh manusia sudah diingatkan tentang Allah sebagai Tuhan yang layak disembah. Firman Allah SWT dalam surah al-A'raf ayat 172:

﴿وَإِذْ أَخَذَ رَبُّكَ مِنْ بَنِي آدَمَ مِنْ ظُهُورِهِمْ ذُرِّيَّتَهُمْ وَأَشْهَدَهُمْ عَلَىٰ أَنفُسِهِمْ أَلَسْتُ بِرَبِّكُمْ  
قَالُوا بَلَىٰ شَهِدْنَا أَن تَقُولُوا يَوْمَ الْقِيَامَةِ إِنَّا كُنَّا عَنْ هَذَا غَافِلِينَ ﴿١٧٢﴾﴾

Bermaksud: "Dan (ingatlah), ketika Tuhan mu mengeluarkan keturunan anak-anak Adam dari sulbi mereka dan Allah mengambil kesaksian terhadap jiwa mereka (seraya berfirman): "Bukankah Aku ini Tuhan mu?" Mereka menjawab: "Betul (Engkau Tuhan kami), kami menjadi saksi". (Kami lakukan yang demikian itu) agar di hari kiamat kamu tidak mengatakan: "Sesungguhnya kami (bani Adam) ialah orang-orang yang lengah terhadap ini (keesaan Tuhan)",

Seterusnya, semasa hidup di muka bumi, roh manusia menjadi asal kepada setiap perlakuannya sama ada baik ataupun buruk. Roh ibarat pengarah kepada jasad. Firman Allah dalam surah as-Syams ayat 7 hingga 10, mengingatkan kita tentang roh atau jiwa manusia yang sentiasa menjadi asbab kebaikan mahupun kejahatan. Firman Allah SWT:

﴿وَنَفْسٍ وَمَا سَوَّاهَا ﴿٧﴾ فَأَلْهَمَهَا فُجُورَهَا وَتَقْوَاهَا ﴿٨﴾ قَدْ أَفْلَحَ مَن زَكَّاهَا ﴿٩﴾ وَقَدْ خَابَ  
مَن دَسَّاهَا ﴿١٠﴾﴾

Bermaksud: Demi jiwa dan penyempurnaan (ciptaannya), maka Allah mengilhamkan kepada jiwa itu (jalan) kefasiqan dan ketakwaannya, sesungguhnya beruntunglah orang yang menyucikan jiwa itu, dan sesungguhnya merugilah orang yang mengotorinya.



Manusia pada hakikatnya bergantung kepada rohaninya sama ada memilih yang baik mahupun yang buruk. Pemilihan ini pula bergantung sejauh mana rohani kita kuat dan sihat yakni berada dalam keadaan suci daripada kekotoran dosa dan noda. Kekuatan rohani memerlukan penjagaan, rawatan dan ubatan.

### **Sidang Jemaah yang dikasihi,**

Penjagaan, rawatan dan ubatan rohani boleh dilakukan dengan beberapa cara;

**Pertama:** Menjaga rohani dengan berusaha bersungguh-sungguh melakukan ketaatan dan meninggalkan kemaksiatan. Memelihara solat fardu ialah perkara yang tersangat penting. Maksiat yang berterusan akan mengotori rohani sekali gus menyebabkan rohani mengidap penyakit yang serius.

**Kedua:** Membanyakkan zikir mengingati Allah dan membanyakkan berselawat kepada Rasulullah SAW. Zikir dan selawat dapat melembutkan rohani, memberi ketenangan, sekali gus menambah kekuatan diri untuk memilih melakukan kebaikan.

**Ketiga:** Mengubati rohani dengan membanyakkan istighfar yakni memohon keampunan Allah SWT daripada semua dosa dan noda yang telah kita lakukan sama ada secara sengaja mahupun secara tidak sengaja. Istighfar ibarat ubat yang dapat merawat rohani yang sakit.

**Keempat:** Banyakkan berdoa agar Allah mengekalkan rohani kita dalam keadaan yang baik.

Rohani juga perlukan latihan untuk kekal dan mudah melakukan kebaikan. Sebagaimana jasmani yang lazimnya dilatih untuk biasa melakukan sesuatu pekerjaan, rohani perlu dilatih dengan sifat-sifat baik, antaranya sifat-sifat pemurah, sabar, syukur, berpada apa yang ada (Qanaah), merendah diri dan menghormati orang lain. Latihan juga perlu dilakukan bagi menghindarkan diri daripada sifat mazmumah, antaranya sombong, bongkak, riak, takabbur, bakhil, tamak, haloba, berdendam dan dengki.

### **Muslimin Mukminin sidang Jumaat sekalian,**

Selepas dicabut roh daripada jasad, walaupun jasad mati, namun roh terus hidup bagi menghadapi alam seterusnya. Roh orang beriman akan disambut oleh malaikat rahmat manakala malaikat azab menyambut roh orang yang ingkar, kafir dan musyrik. Roh manusia beriman yang beramal soleh akan diberi penghormatan



dan wangi-wangian manakala roh orang yang ingkar, kafir dan musyrik akan diangkat dalam keadaan hina dan berbau busuk.

Maka bermula kenikmatan dan kebahagiaan bagi manusia yang memelihara rohnya menyembah dan mentaati Allah Rabbuljalil. Di sebaliknya, bermulanya penyesalan dan penyiksaan bagi yang ingkar, kafir juga musyrik. Firman Allah SWT:

﴿ حَتَّىٰ إِذَا جَاءَ أَحَدَهُمُ الْمَوْتُ قَالَ رَبِّ ارْجِعُونِ ﴿٩٩﴾ لَعَلِّي أَعْمَلُ صَالِحًا فِيمَا تَرَكْتُ كَلَّا إِنَّهَا كَلِمَةٌ هُوَ قَائِلُهَا وَمِنْ وَرَائِهِمْ بَرْزَخٌ إِلَىٰ يَوْمِ يُبْعَثُونَ ﴿١٠٠﴾ ﴾

(Surah al-Mukminun ayat 99 hingga 100)

Bermaksud: “(Demikianlah keadaan orang-orang kafir itu), hingga apabila datang kematian kepada seseorang daripada mereka, dia berkata, “Ya Tuhan ku, kembalikanlah aku (ke dunia), agar aku dapat berbuat kebajikan yang telah aku tinggalkan.” Sekali-kali tidak! Sesungguhnya itu adalah dalih yang diucapkannya saja. Dan di hadapan mereka ada barzakh sehingga pada hari mereka dibangkitkan”

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.

## Khutbah Kedua

الْحَمْدُ لِلَّهِ<sup>4</sup> حَمْدًا يُؤَافِي نِعْمَهُ وَيُكَافِي مَزِيدَهُ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ<sup>5</sup> وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>6</sup> وَكُونُوا مَعَ الصَّادِقِينَ.

### Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا<sup>7</sup>  
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ  
وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي  
الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ  
وَالْمُؤْمِنَاتِ<sup>8</sup>، وَأَصْلِحْ ذَاتَ بَيْنِهِمْ وَآلِفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ  
وَالْحِكْمَةَ، وَتَبِّئْتَهُمْ عَلَى مِلَّةِ رَسُولِ اللَّهِ ﷺ.

**Ya Allah! Ya Rabbal 'alamin** Bimbing jiwa rohani kami agar sentiasa mentaati segala suruhan Mu dan menjauhi segala larangan Mu agar kami mencapai keredaan Mu. Golongkanlah roh kami bersama-sama orang beriman sesudah kematian kami.

<sup>4</sup> Memuji Allah

<sup>5</sup> Selawat ke atas Nabi Muhammad SAW

<sup>6</sup> Pesan Taqwa

<sup>7</sup> Ayat Al-Quran

<sup>8</sup> Doa untuk Kaum Muslimin



**Ya Mannan! Ya Razzaq!**, berkatilah hamba Mu yang melaksanakan tuntutan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fugara* dan *masakin* daripada kekufuran dan kefakiran yang berpanjangan.

**Ya Dzal Jalaali wal Ikram!**, jadikanlah kami antara hamba Mu yang memelihara amanah. Kuatkan iman kami agar menjauhi perbuatan khianat seperti salah guna harta benda bukan milik kami, memberi atau menerima rasuah, menyalahgunakan kuasa untuk kepentingan diri, serta jauhkan kami termasuk dalam golongan yang mengabaikan tanggungjawab yang diamanahkan.

**Ya Maalikal Mulki!**, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

**Ya Malik! Ya Hadi!**, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايِ ذِي الْقُرْبَىٰ وَيَنْهَىٰ عَنِ الْفَحْشَاءِ  
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ ﴿فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا  
عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا  
تَصْنَعُونَ﴾